

Kerajaan Peruntukkan RM250 Juta Bantu Pekebun Kecil Sarawak Tahun Ini
Bernama
27 Mac, 2014

MUKAH, 27 Mac (Bernama) -- Kerajaan memperuntukkan RM250 juta untuk membantu para pekebun kecil kelapa sawit, getah, lada hitam dan sagu di Sarawak tahun ini, kata Menteri Perusahaan Perladangan dan Komoditi Datuk Seri Douglas Uggah Embas.

Peruntukan itu akan digunakan bagi membantu mereka membeli anak benih, baja dan lain-lain seperti yang disyorkan, katanya dalam ucapan perasmian seminar pekebun-pekebun kecil kelapa sawit anjuran Lembaga Minyak Sawit Malaysia (MPOB) di sini Khamis.

Uggah berkata kerajaan Barisan Nasional (BN) sangat ingin membantu para pekebun kecil untuk mencapai produktiviti dan pendapatan yang lebih baik.

"Adalah penting bagi kamu untuk mendapat pendapatan yang lumayan supaya kamu tidak ketinggalan apabila negara mencapai status berpendapatan tinggi menjelang 2020," katanya.

Uggah berkata pada masa ini sejumlah 18,513 pekebun-pekebun kecil minyak sawit yang mengusahakan kawasan seluas 94,437 hektar di Sarawak.

Beliau juga menasihatkan mereka supaya tidak hanya bergantung kepada minyak sawit tetapi mempelbagaikan tanaman mereka kepada lada hitam, getah dan sagu.

"Harga minyak sawit turun naik di pasaran. Apabila harga rendah, kamu boleh bergantung dengan pendapatan daripada tanaman lain," katanya.

Uggah juga berkata beliau akan mengarahkan MPOB memastikan kesemua pembeli tandan buah segar di negeri ini memberikan pekebun-pekebun kecil itu harga yang berpatutan dan seragam untuk hasil mereka.

Mengenai pilihan raya kecil Balingian, Uggah berkata mereka perlu datang awal dengan dan memilih calon BN, Yussibnosh Balo yang berhadapan Abdul Jalil Bujang, calon Parti Keadilan Rakyat.

Beliau berkata jika mereka diwakili Anggota Dewan Undangan Negeri dari BN, mereka akan memiliki suara yang kuat untuk mengutarakan rungutan dan masalah mereka kepada kerajaan.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1025342>